

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA
Broj: **02-01-II-085/19**
Mostar, 15.10.2019. godine

IZVOD IZ ZAPISNIKA
sa druge (II.) redovne sjednice Skupštine
Hercegovačko-neretvanskog kantona

Sjednica je održana dana 15.10.2019. godine u sali Skupštine Hercegovačko-neretvanskog kantona u Mostaru sa početkom rada u 11:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

Prisutni: Marija Bešker, Slavko Bilić, Marija Bošković, Stana Burić, Selma Drljević, Zora Dujmović, Elvedin Grcić, Mejrima Hasić, Nevenko Herceg, Julineta Jurić, Vera Konjevod, Ismet Lulić, Tomislav Martinović, Irma Memidžan, Ivan Odak, Andrea Pehar, Milica Pehar, Đuro Prkačin, Iva Raguž, Slaven Raguž, Vesna Saradžić, Amir Šelo, Šerif Špago, Ajdin Teletović, Nermin Vrtić, Aner Žuljević i Alisa Hajdarević.

Odsutni: Damir Džeba, Kenan Memić, Edis Džino.

Konstatovano je da je na sjednici prisutno **27** poslanika, te da postoji kvorum za rad i punovažno odlučivanje.

Prisutni po pozivu: predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Šerif Špago obavjestio je poslanike da je 02.10. održan sastanak između Tomislava Martinovića i njega kao izabranih zamjenika predsjedavajućih Skupštine HNK-a, te su donijeli odluku da ću funkciju predsjedavajućeg skupštine obavljat Šerif Špago, a Tomislav Martinović će biti zamjenik predsjedavajućeg Skupštine HNK.

Na prijedlog županijskog odbora HDZ-a, Šerif Špago kao predsjedavajući Skupštine HNK donio je Odluku o imenovanju kandidata za premijera kantona, gospodina Nevenka Hercega.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine i to:

1. Poslanička pitanja;
2. Prijedlog Zakona o izmjeni Zakona o zaštiti porodice sa djecom (skraćeni postupak);
3. Prijedlog Zakona o dopuni Zakona o zaštiti porodice sa djecom (skraćeni postupak);
4. Prijedlog Zakona o izmjenama i dopunama Zakona o policijskim službenicima HNK (skraćeni postupak);
5. Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak);
6. Prijedlog Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko – neretvanskog kantona;

7. Prijedlog Odluke o kreditnom zaduženju Hercegovačko – neretvanskog kantona;
8. Izvještaj o radu Kantonalnog javnog pravobranilaštva HNK za 2018. godinu;
9. Odluka o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu.

Otvorena je rasprava.

U raspravi su učestvovali: Ismet Lulić i Vesna Saradžić.

Poslanik Ismet Lulić predložio je dopunu dnevnog reda sjednice sa slijedećom tačkom:

1. Sigurnosna situacija u Hercegovačko neretvanskom kantonu.

Poslanica Vesna Saradžić također je predložila dopunu dnevnog reda sa dvije tačke:

1. Usvajanje ustavnih amandmana na Ustav HNK-a u cilju usklađivanja Ustava HNK-a sa Ustavom F BiH-a i osiguranja konstitutivnosti srpskog naroda u HNK-a, a vezano za izmjene i dopune Ustava F BiH-a odlukom visokog predstavnika međunarodne zajednice za BiH-a od 06.10.2002. godine.

2. Odluka o proglašenju amandmana na Ustav HNK-a.

Usljedila je pauza od 5 minuta.

Predsjedavajući Skupštine HNK Šerif Špago je nakon konzultacija sa predlagačima dopune dnevnog reda i Kolegijem Skupštine HNK obavjestio Skupštinu da su predlagači povukli prijedloge za dopunu dnevnog reda.

Šerif Špago istakao je da su na dnevnom redu nalaze zakoni koji su predloženi da se donesu po skraćenom postupku, pa će uslijediti izjašnjavanje da li će se ti zakoni donositi po skraćenom postupku.

2. Prijedlog Zakona o izmjeni Zakona o zaštiti porodice sa djecom (skraćeni postupak):

Većinom glasova „Za“ uz 1 „Protiv“, Skupština je odobrila da se ovaj zakon razmatra i donese po skraćenom postupku.

3. Prijedlog Zakona o dopuni Zakona o zaštiti porodice sa djecom (skraćeni postupak),

Većinom glasova „Za“ uz 1 „Protiv“, Skupština je odobrila da se ovaj zakon razmatra i donese po skraćenom postupku.

4. Prijedlog Zakona o izmjenama i dopunama Zakona o policijskih službenicima HNK (skraćeni postupak),

Većinom glasova „Za“ uz 3 „Protiv“, Skupština je odobrila da se ovaj zakon razmatra i donese po skraćenom postupku.

5. Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak),

Većinom glasova „Za“ uz 1 „Protiv“, Skupština je odobrila da se ovaj zakon razmatra i donese po skraćenom postupku.

Ostale tačke:

6. Prijedlog Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko – neretvanskog kantona;

7. Prijedlog Odluke o kreditnom zaduženju Hercegovačko – neretvanskog kantona;

8. Izvještaj o radu Kantonalnog javnog pravobranilaštva HNK za 2018. godinu;

9. Odluka o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu.

Usljedio je glasanje za predloženi dnevni red druge redovne sjednice Skupštine. Konstatovano je da je većinom glasova „Za“ uz 3 „Protiv“, usvojen dnevni red Druge redovne sjednice Skupštine HNK.

Usvojeni Dnevni red:

- 1. Poslanička pitanja;**
- 2. Prijedlog Zakona o izmjeni Zakona o zaštiti porodice sa djecom (skraćeni postupak);**
- 3. Prijedlog Zakona o dopuni Zakona o zaštiti porodice sa djecom (skraćeni postupak);**
- 4. Prijedlog Zakona o izmjenama i dopunama Zakona o policijskim službenicima HNK (skraćeni postupak);**
- 5. Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak);**
- 6. Prijedlog Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko – neretvanskog kantona;**
- 7. Prijedlog Odluke o kreditnom zaduženju Hercegovačko – neretvanskog kantona;**
- 8. Izvještaj o radu Kantonalnog javnog pravobranilaštva HNK za 2018. godinu;**
- 9. Odluka o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu.**

Nakon usvajanja dnevnog reda, jednoglasno je usvojen i izvod iz zapisnika sa Druge vanredne sjednice Skupštine HNK.

AD 1. Poslanička pitanja

Amir Šelo

Pozdravljam uvaženo rukovodstvo Skupštine i čestitam na izboru predsjedavajućeg i zamjenika predsjedavajućeg Skupštine HNK-a, uvažni predsjedniče Vlade, drage kolege zastupnici, kolegice zastupnice, drago mi je što vas nakon duže vremena vidim. Ovu priliku bi želio iskoristiti da čestitam našoj kolegici prinovu u porodici, stvarno mi je drago, drago mi je da u nekom vremenu u kojem se ne vidimo i takvih stvari lijepih u našem društvu se dešava.

Drage kolege ministri, predstavnici medija, sve vas srdačno pozdravljam. Postavljam poslaničko pitanje Vladi F BiH. „Poštovani, molim vas da mi dostavite kompletnu informaciju o tome koje ste korake preduzeli prema Vladi Republike Srpske i Elektroprivredi Republike Srpske u cilju zaustavljanja hidroenergetskog projekta „Gornji horizonti“ u okviru kojeg su predviđeni izgradnja hidrocentrale „Dabar“, „Bileća“ i „Nevesinje“?“

Obrazloženje ovog poslaničkog pitanja glasi: „Konceptija sistema „Gornji horizonti“ prvi put je predstavljena 1956. godine, tada su za projektovanje ovoga projekta bili zaduženi „Energoinvest“ Sarajevo i Zavod za vodoprivredu. Projektom „Gornjih horizonata“ tada je zamišljeno prevođenje voda koje pripadaju slivu rijeke Neretve, međutim i tada su se zaustavile aktivnosti po ovom projektu jer bi izgradnja ovog hidroenergetskog projekta imala katastrofalne posljedice po rijeku Bunu, Bunicu, Bregavu, Krupu, te kompletnu dolinu rijeke Neretve. Osim toga važno je naglasiti, da je već urađen tunel Fatničko polje-akumulacija Bileća, kojim se već

prevodi dio rijeke Bregave i Trebišnjice za potrebe hidrosistema Trebišnjica. Nadležno entitetsko ministarstvo Republike Srpske je već izdalo rješenje o odobravanju studije na okoliš za projekat „Gornji horizonti“. Također tender za izgradnju hidrocentrale „Dabar“ je proveden i on je u fazi odabira ponuđača. Obzirom na sve gore navedeno, molim vas da mi dostavite pisanu informaciju o tome koje ste korake kao entitetska vlada preduzeli u cilju zaustavljanja ovog projekta.“

Julineta Jurić

Gospodo predsjedavajući i dopredsjedavajući, poštovane kolegice i kolege zastupnici, predstavnici Vlade i medija, sve vas zajedno pozdravljam. Imam dva zastupnička pitanja.

Prvo zastupničko pitanje upućujem Ministarstvu zdravstva, rada i socijalne skrbi HNŽ-a, a zastupničko pitanje glasi: Koliko obitelji u HNŽ-u ima četvero i više djece?

Drugo pitanje upućujem Ministarstvu obrazovanja, znanosti, kulture i športa HNŽ-a, a zastupničko pitanje glasi: Kada će ministar staviti van snage pravilnik o načinu praćenja i ocjenjivanju ravnatelja obrazovnih ustanova kojim se narušava načelo autonomije jedinica lokalne samouprave? Spomenutim pravilnikom omogućeno je ocjenjivanje ravnatelja srednjih i osnovnih škola od strane Zavoda za školstvo na način da se zadire u pravo osnivača kod imenovanja spomenutih rukovoditelja, čime se na neposredan način ministarstvo i zavod mijesaju u poslove koji nisu u njihovoj nadležnosti. Zahvaljujem.

Milica Pehar

Gospodo predsjedavajući, dopredsjedavajući i pridružujem se čestitkama na vašem imenovanju, poštovane kolegice i kolege, mediji, predstavnici Vlade. Moje zastupničko pitanje je upućeno Ministarstvu unutarnjih poslova HNŽ-a. Kakva je sigurnosna situacija u HNŽ-u glede sadašnjeg broja nelegalnih migranata i koje su moguće aktivnosti MUP-a u slučaju većeg broja nelegalnih migranata, imajući u vidu situaciju ovo što se trenutno događa sa Sirijom i Turskom, ali i glede mogućeg premještanja migranata iz Unsko-sanske županije na prostore HNŽ-a, konkretno Salakovac, te može li se premještanje vršiti bez suglasnosti nadležnih tijela HNŽ-a i Grada Mostara? Ja bih samo obrazloženje. Kolega je maloprije spominjao sigurnosnu situaciju i imajući u vidu ova tri, evo brutalna ta ubojstva koja su se dogodila, koja trenutno izazivaju i kod ljudi nesigurnost, međutim u svakodnevnoj komunikaciji, koliko sam ja u komunikaciji sa ljudima, nema te kontinuirane nesigurnosti i zabrinutosti za sigurnost, pogotovo imajući u vidu institucije koje to rješavaju. Ono što ljude više brine je povećan broj migranata na našim ulicama, ali jednog dijela i to one skupine koje prave probleme, ulazeći u objekte, i ove privatne, presrećući ljude na ulici, čak znam za slučaj u noćnim satima presretanje automobila, ulazeći u lokale u kojima se ne osjećaju ugodno ni gosti, i ovi koji rade su nesigurni, sve je to mislim već poprilično pribilježeno u ovome ministarstvu kojemu ja upućujem pitanje.

Znači ljudi se glede toga osjećaju kontinuirano nesigurni, jer to je nešto već što traje.

Međutim, onaj da je situacija ozbiljna evo imamo primjer, ako ste čitali izjave i odluke koje je donijela Unsko-sanska županija, oni su detektirali sve te probleme, zauzeli su određene mjere, vjerujte mi odnosi se uglavnom na zabrane, ne smiju ovo i ne smiju ono i ne smiju ono.

Međutim, oni su oformili jednu skupinu, operativnu skupinu koja je zatražila od Ministarstva sigurnosti BiH da se zbog svega navedenog napravi izmještaj i to što hitnije, na neke druge lokacije, kako su oni to rekli smještaj, i između ostalog naveden je i ovaj primjer da bi se to dogodilo u našoj županiji, ovi smještajni kapaciteti u Salakovcu. Pa evo moje pitanje ide u tom smislu, ako je situacija trenutno ovakva kakva jest, ako neke druge županije imaju probleme kakve imaju, evo što ministarstvo i ostala tijela misle poduzeti u tom smislu? Hvala vam lijepa.

Stana Burić

Sve vas uljudno pozdravljam i drago mi je da smo se našli i da smo krenuli raditi. Moje zastupničko pitanje upućujem ministru Ministarstva trgovine, turizma i zaštite okoliša HNŽ-a.

Po kojem zakonu funkcionira Turistička zajednica HNŽ-a? Obrazloženje ovom zahtjevu je, svi znamo da je presudom Ustavnog suda, broj U-34/13, koja je objavljena u Službenim novinama F BiH, broj 61/14, Zakon o turističkim zajednicama i promicanju turizma F BiH, Službene novine F BiH, broj 19/96 i 28/3, od 03.07.2014. taj zakon suspendiran, a prestao se primjenjivati 31. siječnja 2015. Prestankom primjene ovoga zakona prestali su i svi propisi doneseni na temelju citiranog zakona. Navedene propise donosila je Vlada F BiH ili nadležni ministar. U HNŽ-u je sad jedino na snazi Zakon o turističkim zajednicama i unapređenju turizma u HNŽ-u, Službene novine HNŽ-a, broj 5/2000, koji definira organiziranje turističke zajednice na dvije razine, lokalna i županijska, kao i raspodjelu prihoda prikupljenih po osnovu važećih propisa Vlade. Hvala.

Vesna Saradžić:

Zahvaljujem predsjedavajući. Ja imam dva poslanička pitanja. Jedno poslaničko pitanje se odnosi na mlade ljude koji su šticeci domova za djecu bez roditeljskog staranja i koji u tim ustanovama mogu ostati do navršene 27 godine pod uslovom da se redovno školuju. Međutim, oni koji ne žele, koji se ne žele obrazovati poslije završene srednje škole gube pravo na boravak u toj ustanovi. Mene interesuje, šta se dešava sa tim mladim ljudima, kakva je njihova sudbina i dali tu prestaje svaka briga države?

Imam pitanje zato za Ministarstvo zdravstva, rada i socijalne zaštite. Dali postoji evidencija, tačnije dali resorno ministarstvo ima bazu podataka djece kojima prestaju prava nakon školovanja, odnosno dali ima izgrađena strategija po ovom pitanju?

A drugo moje pitanje je vezano, odnosno upućujem prema Vladi HNK-a, vezano za zaključak ove Skupštine, od 28.06.2017. godine, kada je Skupština usvojila zaključak da Vlada u roku od 60 dana dostavi mišljenje na sve materijale koji su upućeni u parlamentarnu, odnosno skupštinsku proceduru, do sada, evo svjedočimo, prošlo je pa više od 600 dana, a ne 60, mi nemamo mišljenje Vlade, a tu se nalazi zaista dosta zakonskih rješenja koje bi trebalo da ugledaju svjetlo dana? I također iskreno se nadam, da će u ovom skupštinskom sazivu dnevni red svake sjednice pratiti i mišljenja nadležnih radnih tijela, nadležnih komisija, što b i zaista stvorilo pretpostavke za bolji i uspješniji rad ovog zakonodavnog tijela. Hvala.

Marija Bešker

Sve vas skupa pozdravljam na ovoj Drugoj sjednici Skupštine HNŽ-a. Ja danas imam dva zastupnička pitanja. Jedno pitanje se odnosi prema ministarstvu zdravstva, rada i socijalne skrbi u našoj županiji. Dakle, pitanje se odnosi na problem nepoštivanja kolektivnog ugovora u zdravstvu u našoj županiji. Naime, ovih dana liječnici u Domu zdravlja Rama najavljuju štrajk jer plaća za rujan nije isplaćena po novom kolektivnom ugovoru. U Domu zdravlja navode kako nemaju dovoljno sredstava jer uvećanjem mjesečne uplate Zavoda zdravstvenog osiguranja prema ovoj ustanovi, uključujući i grant sredstva dobivena u siječnju ove godine, bilo je dovoljno samo za izmirenje prošlogodišnjih obveza prema djelatnicima i dijelom za prva tri mjeseca ove godine. Novi kolektivni ugovor stupio je na snagu u srpnju za doktore medicine i stomatologije, a u kolovozu za ostale djelatnike u zdravstvu. Od samog početka bilo je problema sa njegovim provođenjem na nivou cijele županije. Postoje određeni navodi da bi općine trebale sudjelovati u pokriću dijela troškova za uvećanje plaća, ali ne postoji nikakav potpisani dokument ili uporište u zakonu za ove navode. Dogovor tko i koliko treba osigurati za plaće

zdravstvenih djelatnika i koliko je moguće povećati satnice i koeficijent trebao je postići se prije potpisivanja kolektivnog ugovora. Zavod zdravstvenog osiguranja je onaj koji ustanovama osigurava sredstva za plaće i doprinose i nakon potpisivanja kolektivnog ugovora trebalo je doći do povećanja sredstava u skladu sa potpisanim kolektivnim ugovorom. Pitanje je što dalje, hoće li se rebalansom osigurati sredstva za ovu, a bolje planirati za sljedeću godinu ili će se i dalje iz mjeseca u mjesec postavljati pitanje kolektivni ugovora i plaće i na taj način dovesti u pitanje funkcioniranje zdravstvene zaštite sada u Rami, a kasnije i u drugim općinama? I dakle ne trebaju nas onda čuditi ako uslijede i dalje tužbe prema županiji. I drugo pitanje se odnosi prema ministarstvu MUP-a HNŽ-a, pitanje za gospodina ministra. Koji su koraci poduzeti glede izgradnje nove policijske stanice u Općini Prozor-Rama? Hvala vam.

Andrea Pehar

Imam jedno zastupničko pitanje, upućeno Ministarstvu financija HNŽ-a. Naime, protiv ministarstva financija 18 službenika tog ministarstva uložilo je prigovor Agenciji za zaštitu osobnih podataka zbog postojanja opasnosti za povredu prava na privatnost, zbog osnovne sumnje da se na mobilnim aplikacijama koje koriste ministar Faladžić, tajnica Zlomušica i referent Džino, kontrolira videonadzor koji je postavljen unutar objekta. Rješenjem agencije od 17.09.2019. godine zabranjeno je da se zapisi sa unutaršnjeg videonadzora koriste u svrhu evidentiranja, vođenja evidencija, kontrole obavljanja poslova, itd. Moje pitanje glasi: Dali je ministar ispoštovao doneseno rješenje, te uklonio mobilnu aplikaciju? Hvala.

Slaven Raguz

Poštovani zastupnici, poštovani gospodine predsjedniče, poštovani premijeru, gosti. Ja ima dva zastupnička pitanja.

Prvo gospodinu Adnanu Faladžiću, ministru financija. Dakle, koliko je financijskih sredstava ostvarenih u HNŽ-u na temelju posebne naknade za zaštitu od prirodnih i drugih nesreća, utvrđenih odredbom iz stavka 1, članka 180 Zakona o zaštiti i spašavanju ljudi i materijalnih dobara od prirodnih i drugih nesreća, prikupljeno u periodu od 2014. do 2018. i koji je trenutni iznos financijskih sredstava koji se nalaze na tom namjenskom računu, s danom primitka ovog zastupničkog pitanja?

Drugo pitanje, gospodinu Željku Laketiću, ministru gospodarstva HNŽ-a. Tko su i na osnovu kojih mjerljivih kriterija definiranih zakonom o proračunima i zakonom o sustavu državne pomoći, izabrani korisnici sredstava ministarstva gospodarstva s pozicije subvencije privatnim poduzećima i poduzetnicima, a na osnovu javnog poziva objavljenog 27.08.2018. godine? I ovo je bilo pitanje koje sam bio postavio u drugom mjesecu još, pa nadovezujem se i na 2019. godinu. Obrazloženje za oba ova pitanja nije potrebno jer je zakonska obveza objaviti javno sve podatke o svim kontima i novčanim tijekovima županije, što definira zakon o proračunima. Tako da već obrazloženje samoga zakona nije potrebno. Hvala.

Ismet Lulić

Još jednom pozdravljam sve prisutne. Ja imam jedno zastupničko pitanje i jednu inicijativu za izmjenu i dopunu postojećeg zakona. Znači prvo pitanje. Pitanje prema Vladi i ministru pravosuđa, uprave i lokalne samouprave. Šta je sa Zavodom za besplatnu pravnu pomoć? Još 2013. godine je donesen zakon, nedugo nakon toga je osposobljen i prostor za besplatnu pravnu pomoć, ali do dana danas nije to zaživilo, pa evo pitam, u kojoj je to fazi i dali je imenovan direktor? Obrazloženje. Jeli svakako svjesni smo finansijske situacije naših sugrađana, a pogotovo one najugroženije kategorije, koji nisu nažalost u mogućnosti jeli da

plate pravnu pomoć. Tako da kad bi ovo profunkcionisalo svakako jeli umnogome bi pomoglo našim stanovnicima.

Izmjena i dopuna zakona, a znači odnosi se na Zakon o izmjenama i dopunama Zakona o porezu na promet nekretnina u HNK-a, znači u članu 6 se dodaje, to jest to je član 1, a u članu 6 se dodaje, pod 13, državljanin BiH do 38 godina starosti koji ima prebivalište na području ovog kantona, a koji pod A) kupovinom stana do 80 metara kvadratnih ili pod B) kuće tlocrtno površine do 80 metara kvadratnih ili pod C) zemljište za gradnju kuće u površini do 600 metara kvadratnih, prvi put stiče nekretninu po bilo kom osnovu i rješava svoje stambeno pitanje. Ovo se odnosi na oslobađanje poreza jeli za mlade bračne parove, pri kupovini jeli prve stambene jedinice. Obrazloženje. Skupština kantona je 2012. godine usvojila izmjenu zakona kojom se slična poticajna odredba brisala, uz obrazloženje kako se radilo o prostoru zloupotreba koje su direktno nanosile štetu potencijalnog budžetskog prihoda gradova i opština. Međutim, lokalne samouprave su pored navedenih izmjena i dalje u skladu sa zakonom zadržale mogućnost autonomne politike kada je u pitanju navedeni porez u smislu eventualne odluke o oslobađanju od istog kao poticajnog instrumenta za podršku mladima za rješavanje stambenog pitanja. Danas je jeli jasno kako lokalne samouprave nisu iskazale spremnost da navedenu oblast uredi u smislu poticajne politike oslobađanja od poreza onih koji po prvi put rješavaju stambeno pitanje, te stoga osjećam za potrebu da u cilju usporavanja procesa odlaska mladih kroz izmjene zakona kreiramo povoljni poreski ambijent za sticanja prve nekretnine. Uzimajući u obzir da u posljednje vrijeme bilježimo značajan rast investicija u izgradnji stambenih jedinica smatram da bi predmetne izmjene koje su u ovoj formi značajno konkretnije i koje smanjuju prostor manipulacije omogućile prije svega mladima da rješavaju svoje stambeno pitanje, te na taj način dodatno potakle i tržište nekretnina kao prostor za dalji razvoj građevinskog sektora.

Iva Raguž

Zahvaljujem se i sve vas srdačno pozdravljam. Svoje zastupničko pitanje upućujem ministru financija. Tražim da mi dostavite poimenični popis osoba koje su angažirane u ministarstvu financija HNŽ-a na osnovu ugovora o djelu od 2015. godine, zaključno sa današnjim danom. Također tražim da se u popisu obvezno naznači od kada su te osobe angažirane, koju školsku spremu posjeduju i na kojim poslovima rade? Hvala.

Aner Žuljević

Zahvaljujem predsjedniče. Pošto sam prvi put za govornicom da pozdravim sve prisutne. Ja bih postavio poslaničko pitanje ministarstvu obrazovanja, da mi dostavi pregled pedagoških standarda koji su usvojeni za predškolski odgoj i srednje obrazovanje, sa posebnim aspektom broja izvršilaca, a u smislu odgojno-obrazovanih grupa koje se formiraju na odgovarajućem nivou obrazovanja? Ovo pitanje postavljam iz činjenice, da u predškolskim ustanovama na jednog odgajatelja se formiraju grupe od 23-oje do 27-ero djece, gdje u jednoj smjeni od 13 sati do 16 sati sa tim brojem djece radi jedna odgojiteljica, pa postavljam pitanje svima nama, dali smo u sistemu tih pedagoških standarda napravili i adekvatnu procjenu broja djece i broja izvršilaca u smislu realizacije misije tog nivoa obrazovanja i drugog aspekta sigurnosti djece koja borave u takvim institucijama u tom broju, sa tim brojem izvršilaca? Znači treba mi uporedni pregled pedagoških standarda po odgojnim grupama za svaki nivo i broj propisanih izvršilaca za taj nivo.

Drugo pitanje se odnosi na premijera našeg kantona. Zašto premijer dostavlja nalog ministarstvima i upravama da mu se dostavljaju kopije svih naloga za plaćanje koje se dostavljaju u ministarstvo, a zašto ministar finansija šalje dopis u kojem obrazlaže da je to nezakonito? Znači zašto u Vladi kantona imamo situaciju u kojoj prvi čovjek Vlade kantona očigledno nema komunikaciju sa resornim ministrom na nivou onoga što je faktički kontrola utroška javnih sredstava? Znači zašto se dešava situacija da se dostavljaju nalozi za preslike, a zašto ministarstvo to proglašava nezakonitim?

Nevenko Herceg, premijer Vlade HNK/Ž

Lijep pozdrav. I ja prije svega uzvraćam ovaj na čestitkama predsjedavajućem Skupštine gospodinu Špagi, vas sve skupa pozdravljam. I evo drago mi je da smo počeli raditi i u ovom sazivu i u ovom sastavu i da ćemo malo ubrzati ono što smo malo propustili. Javio sam se samo da prokomentiram ono što je aktualno, a aktualni su kolektivni ugovori. Kako znate prošle godine bila je izborna godina i naši socijalni partneri su zahtijevali socijalni dijalog, osobito prošle godine, i taj socijalni dijalog smo ostvarili sa svima i postigli kvalitetne dogovore i ugovore i sa osnovnim i srednjim obrazovanjem i sa policijom i sa javnom službom, a najzahtjevniji i najsloženiji je bio dio koji se odnosio na zdravstvo., a osobito kad su u pitanju liječnici, odnosno njihov sindikat, koji se odvojio od sindikata ukupnih jeli uposlenika u zdravstvu.

Oko toga smo imali veliku polemiku u javnosti, to znate, i dalje smatramo da je upitna reprezentativnost tog sindikata i to je na koncu sud i potvrdio. Međutim, obzirom da je to važan segment ukupnog sustava, a osobito zdravstvenog sustava, mi smo prošle godine potpisali dva kolektivna ugovora, jedan sa liječnicima i stomatolozima i drugi je sa ostalim uposlenicima u zdravstvu, to je medicinsko i ostalo nemedicinsko osoblje, itd. Znate da smo povećali kroz te kolektivne ugovore za sve, da su bili na razini tri godine, povećanje plaće i u obrazovanju, u policiji i javnoj službi, svake godine po 5% u naredne tri godine, da smo to krenuli i da to se isplaćuje. Najsloženiji i najzahtjevniji je bio dio dogovora sa ovim liječnicima i zdravstvenim radnicima i da smo tu ovaj ostvarili dijalog na način da smo imenovali pregovarački tim, koji je uključivao obzirom na svu složenost zdravstvenog sustava u našoj županiji i pravnu i financijsku i organizacijsku i svaku drugu, pregovarački tim koji je uključivao i Vladu, resorna ministarstva, koju je uključivao i Zavod zdravstvenog osiguranja, koji je uključivao menadžment zdravstvenih ustanova i naše načelnike, odnosno predstavnike jedinica lokalne samouprave, obzirom da su oni osnivači jeli domova zdravlja, odnosno zdravstvenih ustanova.

Kroz taj pregovarački proces u okviru pregovaračkog tima je dogovoreno da za povećanje plaće, zahtjev je bio rekao bih argumentiran, u 10 godina nije povećavana plaća, itd., teret nose podjednako Vlada, Zavod zdravstvenog osiguranja i menadžment, odnosno jedinice lokalne samouprave, odnosno osnivači, jedna trećina Vlada, jedna trećina Zavod zdravstvenog osiguranja, jedna trećina osnivači, općine zajedno sa menadžmentom. Kako znate usvojili ste proračun, usvojili ste financijske planove izvanproračunskih fondova, samim time i Zavoda zdravstvenog osiguranja, i usvojili ste i rebalans proračuna Zavoda zdravstvenog osiguranja, kojim je povećano 11.000.000 KM, suficita dato zdravstvenim ustanovama. Znači Vlada i Zavod zdravstvenog osiguranja, drugim riječima županija, je ispunila one svoje dvije trećine obveza i na taj način smo ovaj dio koji se odnosi na nas, na županiju, odgovorili kad su u pitanju ti kolektivni ugovori.

Ja moram reći, da sve naše jedinice lokalne samouprave nisu odgovorile toj zadaći. U prvoj godini primjene kolektivnog ugovora za liječnike je predviđeno povećanje plaća od 20% do 34%, to je ja mislim rekord u svijetu da je jedan kolektivni ugovor predvidio takvo povećanje. To smo ispunili. Ove godine je predviđeno za liječnike povećanje koeficijenta od 0,3%, to je još neki ne znam ni ja milijun i nešto maraka. Ovo govorim čisto da budete informirani do kraja i da ne bude nejasnoća, da možete i vi koji dolazite iz jedinica lokalne

samouprave, iz općina i gradova naših, da možete to prenijeti. Ova trećina ne znam dali je baš svugdje, to ministar ima precizne informacije, mislim da nije svugdje ispoštovana. S druge strane, ima jedna potpuna neodgovornost, zašto je menadžment zdravstvenih ustanova uključen u ovu cijelu priču bio- zato da nema novih upošljavanja, jer i ovako po pojedinim domovima zdravlja imate previše ljudi koji su uposleni, po različitim osnovama, po pojedinim domovima zdravlja u kojima se traži dodatno novac samo uzmete informaciju koliko je uposleno ljudi u zadnjih godinu, dvije, tri, itd., pa to više ni proračun Federacije ne bi ispratio. I zato vas molim, da znamo da je Vlada ispunila svoju obvezu jedne trećine, povećali smo u proračunu sa 2.000.000 na 7.000.000 KM, da je Zavod zdravstvenog osiguranja i kroz rebalans i kroz financijski plan također svoju trećinu ispunio i sad je ostala trećina da jedinice lokalne samouprave, odnosno i menadžment zdravstvenih ustanova, povede računa. Evo zato sam se javio da to razjasnimo na ovoj razini i da prenesete u svoje jedinice lokalne samouprave da su i oni dužni se ponašati domaćinski i također kolegice Bešker ja mislim da općina Rama financijski jako dobro stoji, u odnosu na broj stanovnika da su prihodi, da je proračun godišnji općine Rama na toj razini da može također odgovoriti toj zadaći. Ako jedna općina Stolac ili Ravno ili Neum, koji puno lošije stoje, mogu odgovoriti tim zahtjevima, ja mislim da i Rama u ovoj situaciji koja ima godišnji izvanredan prihod ovaj po nekim osnovama, ovaj može također odgovoriti. Ali s druge strane, pozivamo također menadžment zdravstvenih ustanova, a osobito domova zdravlja, da povede računa kako, koliko i kada i koje osoblje angažira, odnosno upošljava jet to više se ne može izfinancirati. Hvala.

Marija Bešker

Hvala predsjedavajući, hvala i premijeru ovaj na objašnjenju glede ovog pitanja. Jedino samo sam mislila odgovoriti na ovo, da jedinice lokalne samouprave, osnivači da učestvuju i naša općina kako ste rekli ima novaca, to je istina, i učestvuje, i naša općina je učestvovala u prošloj godini i u ovoj godini sa 400.000 KM pomoć Domu zdravlja u opremanju materijalno tehničkih sredstva. Tako da onaj da ona znači ne izbjegava tu jednu trećinu svoju, ona i više od toga učestvuje, prema kolektivnom ugovoru, pa evo nadam se da ćemo naći neki zajednički jezik i da neće biti nekih nesuglasica. Hvala vam.

AD 2. Prijedlog Zakona o izmjeni Zakona o zaštiti porodice sa djecom (skraćeni postupak)

Obrazloženje je dala Alma Kozo, pomoćnica ministra, (Ministarstvo zdravstva, rada i socijalne zaštite HNK-a).

Otvorena je rasprava.

U raspravi su učestvovali: Amir Šelo, Slaven Raguž, Vesna Saradžić i Šerif Špago.

Obavljeno je glasanje po Prijedlogu Zakona o izmjeni Zakona o zaštiti porodice sa djecom (skraćeni postupak).

Nakon glasanja konstatovano je da je većinom glasova „Za“ uz 1 „Protiv“, usvojen Prijedlog Zakona o izmjeni Zakona o zaštiti porodice sa djecom (skraćeni postupak).

AD 3. Prijedlog Zakona o dopuni Zakona o zaštiti porodice sa djecom (skraćeni postupak)

Obrazloženje je dala Alma Kozo, pomoćnica ministra, (Ministarstvo zdravstva, rada i socijalne zaštite HNK-a).

Otvorena je rasprava.

U raspravi su učestvovali: Amir Šelo, Slaven Raguž, premijer Vlade HNK Nevenko Herceg, Stana Burić, Tomislav Martinović i Aner Žuljević.

Obavljeno je glasanje po Prijedlogu Zakona o dopuni Zakona o zaštiti porodice sa djecom (skraćeni postupak).

Nakon glasanja konstatovano je da je većinom glasova „Za“ uz 1 „Protiv“, usvojen Prijedlog Zakona o dopuni Zakona o zaštiti porodice sa djecom (skraćeni postupak).

Šerif Špago predložio je sljedeći Zaključak:

Prijedlog zaključka: Vlada HNK-a će izvršiti detaljnu analizu primjene Zakona o zaštiti porodice sa djecom i u roku od 60 dana predložiti poboljšanja zakona u cilju obuhvaćanja većeg broja korisnika i omogućavanja većih prava porodicama sa djecom u HNK-a, u skladu sa finansijskim mogućnostima kantona. Zaključak stupa na snagu danom donošenja i objavit će se u Službenim novinama HNK-a.

Obavljeno je glasanje po predloženom Zaključku.

Nakon glasanja konstatovano je da većinom glasova „Za“ uz 1 „Protiv“, navedeni Zaključak usvojen.

AD 4. Prijedlog Zakona o izmjenama i dopunama Zakona o policijskim službenicima HNK (skraćeni postupak)

Obrazloženje je dao Slađan Bevanda, ministar unutrašnjih poslova HNK.

Otvorena je rasprava.

U raspravi su učestvovali: Đuro Prkačin, Aner Žuljević, Tomislav Martinović, Stana Burić, Amir Šelo, Slađan Bevanda, Milica Pehar i Ajdin Teletović.

Poslanik Đuro Prkačin predložio je u ime Kluba hrvatskih zastupnika u Skupštini HNK sljedeći zaključak:

1) Zadužuje se Vlada i Ministarstvo unutaršnjih poslova HNK-a da u cilju efikasnijeg izvršavanja svojih ustavnih nadležnosti i modernizacije ustroja ministarstva unutaršnjih poslova u roku od 90 dana pripreme izmjene i dopune Zakona o unutaršnjim poslovima HNK-a i Zakona o policijskim službenicima HNK-a, te da iste upute u skupštinsku proceduru.

2) Zaključak stupa na snagu danom donošenja i objavit će se u Narodnim novinama HNK-a.

Na zahtjev Kluba SDA uslijedila je pauza od 20 minuta.

Nakon pauze uslijedilo je glasanje po Prijedlog Zakona o izmjenama i dopunama Zakona o policijskim službenicima HNK (skraćeni postupak).

Nakon glasanja konstatovano je da je Prijedlog Zakona o izmjenama i dopunama Zakona o policijskim službenicima HNK (skraćeni postupak) jednoglasno usvojen.

Došlo je do kompromisnog prijedloga zaključka, koji je predložio Klub Hrvata a koji glasi: „**Zadužuje se Vlada i Ministarstvo unutrašnjih poslova HNK-a, da u cilju efikasnijeg izvršavanja svojih ustavnih nadležnosti i modernizacije ustroja MUP-a u roku od 120 dana pripreme izmjene i dopune Zakona o policijskim službenicima, te da iste upute u skupštinsku proceduru.**

Zaključak stupa na snagu danom donošenja i objavit će se u Službenim novinama HNK-a.“

Uslijedilo je glasanje o navedenom Zaključku.

Nakon glasanja konstatovano je da je većinom glasova „Za“ uz 4 „Protiv“, usvojen navedeni Zaključak.

AD 5. Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak)

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi nije nitko učestvovao.

Obavljeno je glasanje po Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak).

Nakon glasovano konstatovano je da je Prijedlog Zakona o dopuni Zakona o izvršenju Budžeta HNK za 2019. godinu (skraćeni postupak) jednoglasno usvojen.

AD 6. Prijedlog Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko-neretvanskog kantona

Predsjedavajući Skupštine HNK Šerif Špago pročitao je prijedlog odluke koji je usaglašen na Kolegiju:

„Odluka o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko-neretvanskog kantona:

Član 1, za predsjedavajućeg, zamjenika predsjedavajućeg i članove stalnih radnih tijela Skupštine Hercegovačko-neretvanskog kantona izabrani su:

1) komisija za Ustav, iz reda poslanika izabrani su: za predsjedavajućeg Amir Šelo, za zamjenika predsjedavajućeg Đuro Prkačin, za članove Tomislav Martinović i Vesna Saradžić. Iz reda stručnjaka izabrani su: Tomo Lučić i Kenan Greda.

2) komisija za zakonodavno-pravna pitanja, iz reda poslanika izabrani su: za predsjedavajućeg Tomislav Martinović, za zamjenika predsjedavajućeg Elvedin Grcić, za članove Šerif Špago i Damir Džeba.

Iz reda stručnjaka izabrani su: Željka Čule i Jasminka Bratić.

3) komisija za praćenje rada ministarstva unutrašnjih poslova, ljudska prava i građanske slobode, izabrani su: za predsjedavajućeg Edis Džino, za zamjenika predsjedavajućeg Slavko Bilić, za članove Elvedin Grcić i Đuro Prkačin.

4) komisija za izbor i imenovanja, izabrani su: za predsjedavajućeg Julineta Jurić, za zamjenika predsjedavajućeg Šerif Špago, za članove Damir Džeba i Irma Memidžan.

5) komisija za budžet, finansije i ekonomsku politiku, izabrani su: za predsjedavajućeg Andrea Pehar, za zamjenika predsjedavajućeg Aner Žuljević, za članove Stana Burić i Alisa Hajdarović.

6) komisija za obrazovanje, kulturu, sport i mlade, izabrani su: za predsjedavajućeg Merima Hasić, za zamjenika predsjedavajućeg Vera Konjevod, za članove Amir Šelo i Julineta Jurić.

7) komisija za privredu, poduzetništvo i poljoprivredu, izabrani su: za predsjedavajućeg Nermin Vrtić, za zamjenika predsjedavajućeg Slaven Raguž, za članove Ajdin Teletović i Iva Raguž.

8) komisija za građenje, prostorno uređenje i zaštitu okoliša, izabrani su: za predsjedavajućeg Ivan Odak, za zamjenika predsjedavajućeg Kenan Memić, za članove Ajdin Teletović i Nevenko Herceg.

9) komisija za zdravstvo, rad, socijalnu politiku, izbjegle i raseljene, izabrani su: za predsjedavajućeg Irma Memidžan, za zamjenika predsjedavajućeg Zora Dujmović, za članove Selma Drljević i Iva Raguž.

10) komisija za ravnopravnost spolova, izabrani su: za predsjedavajućeg Milica Pehar, za zamjenika predsjedavajućeg Slavko Bilić, za članove Ismet Lulić i Merima Hasić.

11) komisija za utvrđivanje istovjetnosti tekstova na jezicima konstitutivnih naroda i informiranje, iz reda poslanika izabrani su: za predsjedavajućeg Marija Bošković, za zamjenika predsjedavajućeg Zora Dujmović, za članove Marija Bešker i Alisa Hajdarović. Iz reda stručnjaka izabrani su. Ana Jakovljević i Irma Marić.

Član 2, stupanjem na snagu ove odluke prestaju važiti sve dosadašnje odluke o izboru radnih tijela Skupštine HNK-a.

Član 3, odluka stupa na snagu danom donošenja i objavit će se u Službenim novinama HNK.

Obavljeno je glasanje po Prijedlogu Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko-neretvanskog kantona.

Nakon glasanja konstatovano je da je većinom glasova „Za“ uz 1 „Protiv“, usvojen Prijedlog Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine Hercegovačko-neretvanskog kantona.

AD 7. Prijedlog Odluke o kreditnom zaduženju Hercegovačko – neretvanskog kantona

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi su učestvovali: Slaven Raguž, Slavko Bilić, Tomislav Martinović, Nevenko Herceg, Aner Žuljević, Đuro Prkačin i Ajdin Teletović.

Obavljeno je glasanje po Prijedlogu Odluke o kreditnom zaduženju Hercegovačko – neretvanskog kantona.

Nakon glasanja konstatovano je da je većinom glasova „Za“ uz 1 „Protiv“, usvojen Prijedlog Odluke o kreditnom zaduženju Hercegovačko – neretvanskog kantona.

Predsjedavajući Skupštine Šerif Špago pročitao je slijedeće zaključke koji su predložili Tomislav Martinović i Nevenko Herceg, nakon kojeg su isti dati na glasanje:

- 1) Vlada se zadužuje da prati kreditne i druge aranžmane za projekte energetske efikasnosti i nastavi aktivnosti u realizaciji tih projekata;
- 2) da Vlada u roku od 60 dana dostavi izvještaj o urađenim objektima u projektu energetske efikasnosti u periodu 2015. -2019., sa svim parametrima pojedinačno za sve urađene objekte.
- 3) Pozivaju se općine i gradovi HNK-a da se aktivno uključe u realizaciju projekta energetske efikasnosti javnih objekata na području svojih općina-gradova.
- 4) Zaključak stupa na snagu danom donošenja i objavit će se u Službenim novinama.

Obavljeno je glasanje o navedenim zaključcima.

Nakon glasanja konstatovano je da je većinom glasova „Za“ uz 1 „Suzdržan“, usvojeni navedeni zaključci.

AD 8. Izvještaj o radu Kantonalnog javnog pravobranilaštva HNK za 2018. godinu

Obrazloženje je dao Vlado Bevanda, kantonalni javni pravobranilac.

Otvorena je rasprava.

U raspravi su učestvovali: Stana Burić i Slaven Raguž.

Obavljeno je glasanje o Izvještaj o radu Kantonalnog javnog pravobranilaštva HNK za 2018. godinu.

Nakon glasanja konstatovano je da je većinom glasova „Za“ uz 1 „Suzdržan“, usvojen Izvještaj o radu Kantonalnog javnog pravobranilaštva HNK za 2018. godinu.

AD 9. Odluka o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu

Obrazloženje je dao Suad Balić, ministar pravosuđa, uprave i lokalne samouprave.

Otvorena je rasprava.

U raspravi su učestvovali: Slaven Raguž i Suad Balić.

Obavljeno je glasanje o Odluci o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu.

Nakon glasanja konstatovano je da je većinom glasova „Za“ uz 1 „Protiv“, usvojena Odluka o usvajanju Izvještaja Ministarstva pravosuđa, uprave i lokalne samouprave o izvršenju sankcija u HNK iz člana 1. Zakona o izvršenju sankcija u HNK za 2018. godinu.

Sjednica je završena u 15:00 sati.

Zapisničar
Dario Topić

Predsjedavajući
Šerif Špago